

四庫全書

集部

欽定四庫全書

梅村集卷八

國子監祭酒吳偉業撰

五言律詩一

穿山

勢削懸崖斷根移怒雨來
洞深山轉伏石盡海方開
廢寺三盤磴孤雲五尺臺
蒼然飛動意未肯卧蒿萊

元墓謁剖公

金匱口乃ノ二
卷八
一衲消羣相孤峯占妙香
經聲清石骨佛面冷湖光
花落承趺坐雲歸識講堂
空潭今夜月鐘鼓祝前王

過聞果師園居

帆影牕中沒鐘聲樹杪移
蒼依懸果近閣避偃松歌
菜甲春來蚤茶槍雨後遲
散齋閒獨往應與道人期

游西灣

斷壁猿投栗荒祠鼠竄藤
鐘寒難出樹雲靜恰依僧
選勝從吾意捫危羨客能
生來幾兩屐到此亦何曾

送繼起和尚入天台

振錫西泠渡潮聲定後聞
屐侵盤磴雪衣溼渡江雲
樹向雙崖合泉經一杖分
石林精舍好猿鳥慰離羣

蚤起

蚤涼成偶游惜爽憩南樓
碁響鳥聲動茶烟花氣浮
衫輕人影健風細客心柔
餘興閒支枕清光淺夢收

五月尋山夜寒話雨

客衣輕百里長夏惜登臨
正爾出門夜忽逢山雨深
聊

金史四石
卷八
將斗酒樂無作薄寒吟年少追涼好難為父母心

瑜芬有侍兒明慧從江上歸則言去矣

江上送君別餘情感侍兒對人先母意生小就儂嬉侍
穉偏頻進含嬌托未知今來羅帳底誰解笑微窺

溪橋夜話

予偕子做兄弟臨流比屋異戶同橋久雨得月
新浴乍涼輒書數語以識幽事

竹深斜見屋溪冷不分橋老樹連書幌孤村共酒瓢茶

香消積雨人影話良宵
同入幽栖傳他年未寂寥

感事

不事扶風掾難畊好時田
老知三尺法官為五銖錢築
土驚傳箭呼門避權船此身非少壯
休息待何年

鬼缺

舌在音何讓唇亡口半吐
病同師伯齷方問仲堪醫露
涿從人誚銜碑欲語遲
納言親切地補闕是良規

織女

金史紀事本末卷八
軋軋鳴梭急盈盈涕淚微懸知新樣錦不理舊殘機天
漢期還待河梁事已非玉箱今夜滿我獨賦無衣

贈蒼雪若鏡兩師見訪

孤雲所宿處清磬出層陰高座惟斯道扁舟亦此心尋
秋逢講樹到海發禪音月色霜天正吾師詩思深

謝蒼雪贈葉染道衣

娑羅多寶葉煎水衲衣黃不染非真色拈來有妙香足
跌僧相滿手綻戒心長一笠支郎許安禪向石傍

送李友梅還楚寄題其所居愛吾廬友梅慕陶故
詩以記之

寒雪滿潯陽江程入楚鄉灘逢黃鵠怒嶺界白雲長十
里魚蝦市千頭橘柚莊歸人貫村酒彷彿是柴桑

黃州杜退之改號蛻斯其音近而義別索詩為贈
述志賦秋蟲孤吟御遠風掇皮忘我相換骨失哀翁畫
以通靈妙詩因入悟空少陵更字說不肯效韓公

王瓜

金匱口乃...
同摘誰能待離離早滿車弱藤牽碧蒂曲項戀黃花客
醉嘗應爽兒涼枕易斜齊民編月令瓜徙重王家

豇豆

綠畦過驟雨細束小虹蜺錦帶千條結銀刀一寸齊貧
家隨飯熟餉客借饒題五色南山豆幾成桃李谿

送照如禪師還吳門

秋氣肅羣慮衲衣還故栖雲生孤杖迥月出萬山低乞
火青楓寺疏泉紫芋畦石牀椶拂子盡說是曹溪

師姓曹

初冬月夜過子俶

月色破林巒貧家共一灘
門閉孤樹直影逼兩人寒
淪茗誇陽羨論詩到建安
亦知譚笑久良夜睡應難

園居柬許九日

迸笋穿茶竈歌花罨釀房
曝書移晷几敲筆響琴牀
晚食知眠懶輕衫便酒狂
脩然吾願足不肯負滄浪

晚泊

寒鋤依岸直輕槳蕩潮斜
樹脫餘殘葉風吹亂晚鴉
沙

金史口乃ノ二下
深留豕跡溪靜響魚乞火村醅至炊烟起荻花

題心函上人方菴

頂相安單穩圓塵覆鉢銷誰知眠丈室不肯效團焦石
鼎支茶竈匡牀掛癭瓢一枝方竹杖夜雨話參寥

題做上人代笠

空山無住着就石架孤筇愛雪編茅整愁風剪箬工樹
陰休灌叟簑雨滴漁翁要自謀安隱吾師息此中

過南屏訪無生上人

謂此一公住偶來聞午鐘山容叅雪嶠

無生壁間有雪嶠師畫

佛

火隱雷峯路細因留竹雲深好護松精廬人不到相對話南宗

簡武康姜明府

地僻誰聞政知君自不同
放衙山色裏聽事水聲中
竹稅官橋市茶商客渚
蓬前溪歌舞在父老習遺風

其二

花發訟庭香松風夾道涼
溪喧因紙貴邑靜為蠶忙
魚

金句曰石八二
鳥高人政烟霞仙吏裝知君趨召日取石壓歸航

夜泊漢口

秋氣入鳴灘鈎簾對影看久游鄉語失獨客醉歌難星
淡漁吹火風高笛倚闌江南歸自近盡室寄長安

曉粧

學母粧應早留花稱小圍為憐新繡領故着舊時衣性
急梳難理衫深力易微素奩猶未斂祇道侍兒非

送友人還楚

燈火照殘秋聞君事遠游客心分暮雨寒夢入江樓酒
盡孤峯出詩成衆靄收一帆灘響急落日滿黃州

送黃子羽之任四首

子羽能詩以微
辟為新都令

襄陽

始見征途亂十年憂此方君還思聖主何意策賢良楚
蜀烽烟接江山指顧長祇今龐德祖不復卧襄陽

巫峽

高深積氣浮水石怒相求勝絕頻宜顧竒情不易留蒼

金史紀事本末卷八
涼難久立浩蕩復誰收詩思江天好春雲滿益州

成都

魚鳧開國險花月錦城香巨石當門觀竒書刻渺茫江
流人事勝臺榭霸圖荒萬里滄浪客題詩問草堂

新都

丞相新都後如今復幾人先皇重元老大禮自尊親舊
俗科條古前賢風尚醇似君真茂宰白石水潏潏

讀史雜感

吳越黃星見園陵紫氣浮六師屯鵲尾雙闕表牛頭鎮
靜資安石艱危仗武侯新開都護府宰相領揚州

其二

莫定三分計先求五等封國中惟指馬聞外盡從龍朝
事歸諸將軍輸仰大農淮南數州地幕府但歌鐘

其三

北寺讒成獄西園賄拜官上書休討賊進爵在迎鑾相
國爭開第將軍罷築壇空餘蘇武節流涕向長安

其四

御刀周奉叔應敕阮佃夫列戟當關怒高軒哄道呼監
奴右衛率小吏執金吾匍匐車塵下腰間玉鹿盧

其五

聞築新宮就君王擁麗華尚言虛內主廣欲選良家使
者螭頭舫才人豹尾車可憐青塚月已照白門花

其六

貴戚張公子奄人王寶孫入陪宣室宴出典羽林屯狗

馬來西苑能優待北門不特中旨名著籍並承恩

其七

漫說黃龍府頹愁朱雀桁三軍朝坐甲十客夜傳觴王
氣矜天塹邊書棄御牀江州陳戰艦不肯下潯陽

其八

偏師過采石突騎滿新林已設牽羊禮難為刑馬心孤
軍摧韋瓘百戰死王琳極目蕪城遠滄江暮雨深

其九

金少曰 萬一
八
鞭棘千夫聚 艨衝百里通
白衣搖急漿 青草伏彊弓
塢壁推巖虎 江湖屬管崇
丹陽故鄣郡 山越土人風

其十

越絕山河在 征人尚錦袍
乘風竹箭利 狎浪花犀豪
怪石千灘險 疑城百里高
臨江諸將帥 委甲甬東逃

贈徐子能

徐子聲名早 相聞盡故人
懶余交太晚 知我話偏真
道在應非病 詩成自不貧
休教嗟拊髀 纔得保沉淪

子能
病塞

其二

未卜林塘隱還將野興消
鶴聲常入市樹勢欲侵橋
老病人扶拜狂吟客見招
知從甫里近白首共逍遙

初春同王惟夏郁計登夜坐竒懷室

長日誰教睡夜深還擁書
一燈殘酒在斜月暗牕虛
官退才須減名高懶不除
梅花侵曉發蚤得伴閒居

新霽喜孫令修至同步後園探梅

偶來因客興信步得吾園
雨足山低樹花開日滿軒
掃

林休石磴劓藥遇泉源絕壑人聲至驚栖聽鳥喧

送王子彥

王以孝廉不仕後
因事避吏將入都

失意獨馬往自憐歸計非無家忘別苦多難愛書稀白
首投知己青山負布衣秋風秣陵道惆悵素心違

遇舊友

已過纔追問相看是故人亂離何處見消息苦難真拭
眼驚魂定銜杯笑語頻移家就吾住白首兩遺民

偶值

偶值翻成訝如君不易尋出門因酒癖謝客為書淫久
坐傾愁抱高譚遇賞心明朝風日暇餘興約登臨

座主李太虛師從燕都問道北歸尋以南昌兵變
避亂廣陵賦呈八首

風雪間關路江山故國天還家蘇武節浮海管寧船妻
子驚還在交朋淚泣然兩京消息斷離別蚤經年

其二

白鹿藏書洞青牛采藥翁買山從五老避世棄三公舊

德高詞苑長編續史通十年金馬夢回首暮雲中

其三

愛酒陶元亮能詩宗少文
桃花忘世事明月望湘山
靜聞鞀鼓江空見陣雲
不知時漢晉誰起灌將軍

其四

浩劫知難問秋風天地哀
神宮一柱火仙竈五丁雷
劍去龍沙改鐘鳴鼉鼓來
可憐新戰骨落日獨登臺

其五

彭蠡初無雁潯陽近有書干戈愁未定骨肉苦離居江
渚宵傳柝山城里出車終難致李白卧病在匡廬

其六

世路長為客家園况苦兵酒偏今夜醒

新倭切

笛豈去年

聲一病餘孤枕千山送獨行馬當風正緊拔柁下湓城

其七

莫問投何處輕帆且別家漫栽彭澤柳好種廣陵瓜飲
興愁來減詩懷老自誇南徐山色近題語報侯芭

其八

海內論知己天涯復幾人
關山思會面戎馬涕沾巾
賓客侯嬴老諸生原憲貧
相看同失路握手話艱辛

歲暮送穆大苑先往桐廬

客中貪過歲又上富春船
燭影歌寒枕江聲聽夜眠
石高孤岸迥雪重半帆偏
明日停橈處山城落木天

其二

卧病纔回棹征輶此再游
亂山穿鳥道匹馬向嚴州
遠

水浮沙嶼高楓入郡樓
知君風雨夜落葉起鄉愁

其三

到日欣逢節招尋有故人
官厨消絳蠟客舍煖烏薪
鎖印槐廳靜頌春
柏酒新翩翩杜書記
瀟灑得閒身

其四

知爾貪乘興衝寒蠟
屐忙鶴翻松磴雪
猿守栗林霜
官醞移山榼
仙碁響石房
嚴光如可作
故態客星狂

曉發

曉發桐廬縣蒼山插霧中江村荒店月野戍凍旗風衣
為裝綿暖顏因被酒紅日高騎馬滑愁殺白頭翁

客路

客路驚心裏棲遲苦未能龍移對江塔雷出定龕僧

武林

近事林黑人譚虎臺荒吏按鷹清波門外宿潮落過西興

贈劉虛受

中歲交朋盡新知得此翁道因山水合詩向病愁工悟
物談功進亡情耳識空

重聽

真長今第一兄弟擅宗風

其二

識面已頭白論心惟草玄
孝標三世史摩詰一門禪
獨宿高齋晚微吟細雨天
把君詩在手相慕十年前

苦雨

亂烟孤望裏雨色到諸峯
野漲餘寒樹江昏失暝鐘
夜深溪碓近人語釣船逢
愁聽惟支枕艱難媿老農

海溢

積氣知難極驚濤天地奔
龍魚居廢縣人鬼語荒村
異

國帆檣落新沙島嶼存橫流如可救滄海漢東門

閬園詩

并序

閬園者李太虛先生所創別墅也廣厦層軒迴廊曲榭門外有修陂百頃堂前列灌木千章棊文石於西山導清流於南浦綠蕖被沼紫柰當牕芳枳樹籬修藤作架白鶴文鷗飛翔廣囿駕鷺黃鵠游泳清池豈止都蔗為鄉素馨成幄已哉况經傳惠遠厨藏金粟之儀山近麻姑壇擬

玉臺之觀果名羅漢花號佛桑紺室聞鐘丹泉
洗藥茲為靈境夫豈塵區而吾師偃仰茂林從
容長薄千里致程鄉之酒十年探禹穴之書叔
夜銅鎗可容一斗茂先寶劍足值千金焚香而
明月滿簾鬪茗而清風入座張華燈而度曲指
孤嶼以題詩若將終焉洵可樂也不謂平原鹿
走一柱蛟飛始也子魚已下虞翻之說既而孝
頃遽來周迪之軍浪激亭湖兵焚樵舍馬矢積

桓伊之墓鼓聲震徐孺之臺將仙人之藥白車
箱俱移天上豈帝子之珠簾畫棟尚出人間雲
卿棄藥圃而不歸少陵辭灤谿而又往放舟采
石浪跡雷塘愛子則痛甚元規故園則情同王
粲望匡山而不見指章水以為言嘿嘿依人傷
心而已於是稽生授簡趙子抽毫重邀大別之
雲再續小園之賦庶幾峰連北固不異香爐潮
上邗溝居然溢口心乎慰矣歎也何如偉業幸

遇龍門曾隨兔苑自灌園於海畔將負笈於山
中顧茲三逕之荒已近十年之別願依杖屨共
肆登臨弟子昇陶令之輿興思彭澤故吏遂謝
公之屐寄念東山爰托五言因成十律華林園
追陪之宴而今渺然浣花潭話舊之遊於茲在
矣

先生家住處門泊九江船彭蠡春來水匡廬雨後天
荷香石浦航稻熟湖田獨坐憑闌久虛堂且晏眠

其二

有客扶藜過空山猿鳥知苔侵蘿逕屐松覆石牀碁楚
米炊菰早吳羹斫鱸遲柴門相送罷重定牡丹期

其三

性僻耽書畫蹉跎遍兩京提攜詩卷重笑傲客囊輕小
閣尊彝古高人池館清平生無長物端不負虛名

其四

興極歌還哭狂來醉復醒牀頭傾小榼壁後卧長瓶月

出呼漁艇花開置幔亭門前流水急數點暮山青

其五

絕壑非人境丹砂廢井留移家依鶴砦穿水過龍湫白石心長在黃金藥可求何時棄妻子還伴葛洪游

其六

我愛東林好還家學戴顓經臺憑怪石塵尾折青松書卷維摩論溪山曹洞宗欲修居士服持偈問黃龍

其七

倦策登臨減名山坐卧圖避人來栗里投老乞菱湖舊
業存榆柳新齋待竹梧亂離知又至安穩故園無

其八

陶令休官去迎門笑語忙那知三逕菊却怕九秋霜十
具牛誰種千頭橘未荒可憐思愛子付托在滄浪

其九

青史吾徒事先朝忝從臣十年搜典冊萬卷鎖松筠好
友須分局竒書肯借人劫灰心力盡牢落感風塵

其十

早買淮陰棹仍登江上樓
曉來看北固何處似南州
王謝池臺盡齊梁寢樹秋
天涯憂國淚豈為故鄉流

課女

漸長憐渠易將衰覺子難
晚來燈下立攜就月中看
弱喜從師慧貧疑失母寒
亦知談往事生日在長安

嘉湖訪同年霍魯齋觀察

官舍鶯聲裏旌旗拂柳堤
湖開山勢斷塔迥樹痕齊
世

路催青鬢春風到紫泥還看鮑司隸驄馬灞橋西

其二

蹤跡知何處溪山興不孤閒亭供烏雀仙吏得蓴鱸紅
荔涪江樹青楓笠澤圖須教趙承旨烟雨補南湖

其三

門外銀塘滿鷗飛入晚衙公田若下酒鄉夢杜陵花水
碓筒輸紙溪船篋貢茶看雲堪挂笏幕客莫思家

其四

羽蓋菰城道春風行部勞長公山郡簡小杜水嬉豪簫
鼓催征騎琴書壓畫舸獨憐憔悴客剪燭話同袍

贈郡守李秀州隆吉

偶值溪山勝相逢太守賢邀人看水閣載酒上菱船鶴
料居官俸魚租讌客錢今朝風日好春草五湖烟

野望

京江流自急客思竟何依白骨新開壘青山幾合圍危
樓帆雨過孤塔陣雲歸日暮悲笳起寒鴉漠漠飛

其二

衰病重聞亂憂危往事空殘村秋水外新鬼月明中樹
出千帆霧江橫一笛風誰將數年淚高處哭塗窮

送張學博孺高之官江北

薄宦非傍郡孤舟幾日程詩傳沛子弟禮問魯諸生水
冽官厨釀城荒射圃耕北來車馬道猶喜簡逢迎

冬霽

烟盡生寒日山雲不入城船移隔縣雪屋遠半江晴照

眼庭花動開顏社酒清渚田飛雁下近喜有人耕

松化石

金陵任白
受所藏

高士無凡好常思買一峯如何三徑石却本六朝松老
筆應難畫名山不易逢穀城相遇處肯復受秦封

嘲張南垣老遇雛妓

莫笑韋郎老還堪弄玉簫醉來惟捫腹興極在垂髻白
石供高枕青樽出細腰可憐風雨夜折取最長條

破山興福寺僧鶴如五十

聽法穿雲過傳經泛海來
花深山徑遠石破講堂開
潭出高人影泉流古佛苔
長留千歲鶴聲繞讀書臺

園居

傍城營小築近水挿疎籬
岸曲花藏釣牕高鶴聽
苔移床穿磴遠喚茗隔溪
遲自領幽居趣無人到此知

梅村集卷八

欽定四庫全書

集部

梅村集卷十九

詳校官內閣中書臣陸湘

助教臣常循覆勘

總校官知縣臣楊懋珩

校對官待詔臣胡士震

謄錄監生臣葉中桂

欽定四庫全書

梅村集卷九

國子監祭酒吳偉業撰

五言律詩二

高郵道中

野宿菰蒲晚荒陂積雨痕湖長城入岸塔動樹浮村
漁出沙成路僧歸月在門牽船上瓜瓞吹火映籬根

其二

十里藕塘西浮圖插碧虛霜清見江楚山斷入淮徐水
驛難逢樹溪橋易換魚客程愁幾日已覺久無書

其三

曾設經年戍殘民早不堪柳營當午道水柵算丁男雪
滿防旗暗風傳戰鼓酣淮張空幕府樓艦隔江南

其四

甓社重來到人家出遠林種荷泥補屋放鴨柳成陰蝦
菜春江酒烟蓑暮雨砧曹生留畫水三十六陂深

高郵
有曹

生畫水壁米元章極稱
之其地有三十六陂

清江閘

岸束穿流怒帆遲幾日程石高三板浸鼓急萬夫爭善
事監河吏愁逢橫海兵

時有事兩粵
兵過海上

我非名利客歲晚

肅宵征

得廬山願雲師書

絕頂誅茅處蒼崖怪瀑風書來飛鳥上僧出亂流中世
事千峰斷鄉心半偈空却將兄弟夢烟雨問江東

過姜給事如農

侍從知名早蕭條淮海東
思親當道梗

如農迎母會膠萊有兵亂哭

弟在途窮

如須避地沒於吳下

骨肉悲歌裏君臣信史中
翩翩同

楊客相對作衰翁

遠路

遠路猶兵後寒程况病餘
裝綿妻子線致藥友人書
晚渡河津馬晨冰驛舍車
蕭條故園樹多負向山廬

過東平故壘

重鎮銅龍第，雄邊珠虎牌。
柳穿驍騎箭，花落美人釵。
有客謀亡海，無書勸正淮。
將軍留戰骨，狼藉雒陽街。

旅泊書懷

已過江南雪，須防濟北冰。
扁舟寒對酒，獨客夜挑燈。
流落書千卷，清羸米半升。
徵車何用急，慚媿是無能。

黃河

金龍口決河從北入海清江
宿遷水勢稍緩皆起新沙

白浪日崔嵬，魚龍亦壯哉。
河聲天上改，地脈水中來。
潮落神鴉廟，沙平戲馬臺。
滄桑今古事，戰鼓不須哀。

桃源縣

在黃河南去淮陽八十里

豈有秦人住何來浪得名山中難避地河上得孤城
桃柳誰曾植桑麻近可耕君看問津處烽火只縱橫

膠州

時有兵變

將已三年億兵須六郡豪一時緣調遣平昔濫旌旄
後顧憂輜重前軍敢遁逃只今宜早擊都護莫辭勞

白洋河

在淮安西北膠州叛兵從此過河時已收縛

膠海愁難定孫恩戰艦多却聞挑白馬此處渡黃河一

戰收豺虎千軍唱橐駝淮西兒女笑溟渤亦安波

過古城謁三義廟

去桃源八十里爲石崇鎮下邳所築非三國時古城也土人以

傳記立廟傳奇有桃源結義耳食附會幾以爲真矣

廟貌高原古村巫薦白蘋河山雖兩地兄弟只三人
舊俗傳香火殘碑誤鬼神普天皆漢土何必史書真

項王廟

在宿遷項王下相人即其地也

救趙非無算抗秦亦有名情深存魯沛氣盛失韓彭
垓下騅難逝江東劍不成淒涼思畫錦遺恨在彭城

過南旺謁分水龍王廟

鱗甲往來中靈竒奪禹功平分泰山雨兩使濟河風岸
似黃牛斷流疑白馬通始知青海上不必要盡朝東

送天台何石湖之官臨晉兼簡蒲州道嚴方公

山色界諸盤河流天際看孤城當古渡絕岸入王官社
鼓堯祠近鄉書禹穴難若逢嚴夫子爲報故人安

送紀伯紫往太原

不識虛從事能添幕府雄河穿高闕塞山壓晉陽宮霜

磧三闕樹秋原萬馬風相依劉越石清嘯戍樓中

其二

羨殺狂書記翩翩負令名軍知長揖貴客傲敵裘輕酒
肆傳呼醉毬場倒屣迎須看雁門守不及洛陽生

其三

客舍同三子春風去住愁那知爲此別五月又并州榆
莢催征騎榴花落御溝知君分手意端不爲封侯

三子
韓聖

秋胡彥遠及伯紫
也時彥遠已先行

其四

佐府偏多暇從容岸幘時詩成千騎待檄就百城知從
獵貪呼妓行邊快賭碁歸將出塞曲唱與五陵兒

送友人往真定

五月常山去滹沱雨過清賣漿無舊隱挾瑟有新聲曳
履叢臺客投戈熊耳兵如逢趙公子須重魯連生

送純祐兄浙中藩幕

散吏仍爲客輕帆好過家但逢新種柳莫話久看花黃

閣交須舊青山道未賒獨嗟兄弟遠辛苦滯京華

其二

一第添憔悴似君遭遇稀杜門先業廢乞祿壯心違
歌管移山棹湖光上客衣浪遊裝苟足叩我故園扉

其三

亦有湖山興棲遲減宦情官非遷吏傲客豈故侯輕
粉壁僧寮畫烟堤妓舫聲從容趨府罷斗酒聽流鶯

其四

忽忽思陳事全家客剡中江山連暮雨身世隔殘虹高
館燃官燭清猿叫曉風一竿秋色裏踪跡媿漁翁

曹秋岳龔芝麓分韵贈趙友沂得江州書三首

策馬高原去烟鴻仰視雙疎鐘穿落木殘日動寒江浪
跡愁偏劇孤懷俠未降舊交相見罷沽酒話南牕

其二

誰識三公子蕭條下澤車門高輕仕宦才大狎樵漁黃
葉窮幽興青山出異書不須身貴早千騎上頭居

其三

已歸仍是客不遇却難留更作異鄉別倍添游子愁風
霜違北土兵甲阻西州一雁低飛急關河萬里秋

病中別字令弟

昨歲衝寒別蕭條北固樓關山重落木風雪又歸舟地
僻成鴉亂天長塞雁愁客程良不易何日到揚州

其二

秋盡霜鐘急歸帆畏改風家貧殘雪裏門閉亂山中客

睡愁難熟鄉書喜漸通長年沽市酒宿火夜推篷

其三

十日長安住何曾把酒尊病憐兄彊飯窮代女營婚別
我還歸去憐渠始出門往來幾半載辛苦不須論

其四

消息憑誰寄羈愁祇自哀逾時游子信到日老人開久
病吾猶在長途汝却回白頭驚起問新喜出京來

其五

早達成何濟遭時信眇歡客游三月病世路一生難憂
患中年集形容老輩看相逢俱壯盛五十未爲官

其六

此意無人識惟應父子知老猶經世亂健反覺兒衰萬
事愁何益浮名悔已遲北來三十口盡室更依誰

其七

似我真成誤歸從汝仲兄教兒勤識字事母學躬耕州
郡羞干請門庭簡送迎古人親在日絕意在虛名

其八

老母營齋誦家貧只此心
飯僧餘白氎裝佛少黃金
骨肉情難盡關山思不禁
楞嚴經讀罷無語淚痕深

其九

寡妹無家苦拋離又一年
老親頻念此別語倍潸然
性弱孤難立門衰產易捐
猶留兄弟在中外幾人憐

其十

穉子稱竒俊迎門笑語忙
挽鬚憐尚幼摩頂喜堪狂
小

輩推能慧新年料已長吾家三萬卷付托在兒郎

再寄三弟

拙宦真無計歸謀數口資海田人戰後山稻雨來時官
稅催應早鄉租送易遲荷鋤西舍叟憐我問歸期

其二

五畝山園勝春來客喚茶籬荒謀補竹溪冷課栽花石
迸墻根動松欹屋脚斜東莊租苟足修葺好歸家

再送王元照

行止頻難定裝輕忽戒塗望人離樹立征棹入雲呼野
色平沙雁朝光斷岸蘆此中蕭瑟意非爾不能圖

送孫令修游真定

窮達非吾事霜林萬象凋北風吹大道別酒置河橋急
雪迴征雁低雲壓怒鷗曾為燕趙客寥落在今朝

送周子倬張青瑁往河南學使者幕

不第仍難去棲遲幕府游幾人推記室自古在中州置
酒龍門夜論文虎觀秋得依張壯武揮塵盡風流

其二

少室多奇士君尋到幾峰山深惟杖策雲盡却聞鐘
文字真詮近鬚蒼道氣濃相貽書一卷歸較葛陂龍

子似好道

其三

二陸來江左三張入雒中賦誇梁苑雪歌起鄴臺風
儉父休輕笑吳儂雅自雄短衣頻貫酒射獵過城東

其四

誰失中原計經過廢壘高秋風向廣武夜雨宿成臯
此

地關河險曾傳將士勞當時軍祭酒何不用吾曹

其五

極目銅駝陌宮墻噪晚鴉北邙空有骨南渡更無家青
史憐如意蒼生遇永嘉傷心譚往事愁見雒陽花

其六

河流天地盡白日待銷沉不謂斯文喪終存萬古心典
墳留太學鐘鼓起華林清雒安瀾後遺編定可尋

送相陰沈旭輪謫判深州

謫宦經年待蹉跎
忝此州猶然領從事
未得比諸侯
旅食沾微祿
官塗托浪游
却嫌持手板
廳壁姓名留

其二

月出瀟湘水
思家正渺然
不知西去信
可上北來船
故舊憐除目
妻孥笑俸錢
免教烽火隔
飄泊楚江邊

其三

此亦堪為政
無因笑傲輕
爾能高治行
世止薄科名
烟井流移復
春苗斥鹵耕
古來稱一尉
何必尚專城

其四

豈不貪高卧其如世路非故園先業在多難幾時歸遇
事愁官長逢人羨布衣君看洞庭雁日夜向南飛

送王子彥歸南

得失歸時輩如君總不然共知三徑志早定十年前身
業先疇廢家風素德傳蕭條書一卷重上故鄉船

其二

一第雖無意名場技有餘解頰匡鼎說運腕率更書材

已遭時棄官猶辱

詔除白頭纔一命需次復何如

子彥已謁選得官需次未投

其三

錯受塵途誤栖栖蚤半生
中年存舊業雅志畢躬耕
憂患妨高卧衰遲累遠行
與君嗟失路不獨為無成

其四

客裏逢中表登臨酒一杯
好將身計拙留使後人材
燈火鄉園近風塵笑語開
相攜孫入抱解喚阿翁來

子彥近得

孫余之
外孫也

代州

萬里無征戍三關却晏然
河來非漢境雪積自堯年
將老空屯卧僧高絕漠還
中原偏戰鬪此地不為邊

送穆苑先南還

遍欲商身計相逢話始真
幸留殘歲伴忍作獨歸人
年逼愁中老家安夢裏貧
與君謀共隱為報故園春

其二

驟見疑還喜，堪當我半歸。路從今日近，信果向來稀。同
事交方散，殘編道已非。老親看慰甚，坐久更沾衣。

其三

舍弟今年別，臨分恰杪秋。苦將前日淚，重向故人流。海
國愁安枕，鄉田喜薄收。相期裁數紙，春雨便歸舟。

其四

庭樹書來長，空階落葉黃。酒乘今夜月，夢遶一林霜。客
過探松塢，童饑偃石床。因君謝猿鶴，開我北山堂。

送何容菴出守贛州

想見征途便還家正早秋江聲連賜第帆影上浮丘兒
女貧成長親朋感去留無將故鄉夢不及石城頭

其二

郡閣登臨迥江湖已解兵百灘爭二水一嶺背孤城石
落蛟還鬪天晴雁自橫新來賢太守官柳戰場生

其三

三載為郎久棲遲共一貧師恩衰境負友道客途真世

德推醇謹鄉心入隱淪蕭條何水部未肯受風塵

其四

弱息憐還幼扶持有大家高門雖宦跡遠嫁况天涯小
字裁魚素長亭響鹿車白頭雙淚在相送日將斜

猿

得食驚心裏逢人屢顧中側身探老樹長臂引秋風傲
弄忘形便羈縲抵掌工忽如思父子回叫故山空

索駝

獨任三軍苦安西萬里行鑄銅疑鶴頸和角廢驢鳴山
負祁連重泉知鄙善清可憐終後載汗血擅功名

象

神象何年至傳聞自戰場齒能齊玉德性不受金創白
足跣趺坐黃門拜舞行越人歸駕馭未許鼻亭狂

牛

瑩角偏轅快奔蹄伏軛窮賣刀耕隴上執鞭犒軍中游
月庖丁技扶犁田父功

君王思繭栗座右置幽風

時頌戒
殺牛文

蒲萄

百斛明珠富清陰翠幕張曉懸愁欲墜露滴愛先嘗色
映金盤果香流玉椀漿不勞葱嶺使常得進君王

石榴

五月華林晏榴花入眼來百株當戶牖萬火照樓臺絳
帳垂羅袖紅房出粉腮江南逢巧笑齧齒向人開

江南
石榴

多裂北
方獨否

蘋婆

漢苑收名果如君滿玉盤幾年沙海使移入上林看對
酒花仍艷經霜實未殘茂陵消渴甚飽食勝加餐

文官果

近世誰來尚何因擅此名小心冰骨細虛體綠袍輕味
以經嘗淡香從入手清時珍誇衆口殺核大縱橫

冰

清濁看都淨長安喚買冰見來消易待欲問價偏增潔

自盤中顯涼因酒後勝若求調燮理坐上去青蠅

南苑春蒐應

制

詔閱期門旅鏡歌起上林風雲開步伍草木壯登臨
天子三驅禮將軍百戰心割鮮親讌罷告語

主恩深

送田髯淵孝廉南還

客路論投分三年便已深每尋蕭寺約共話故園心遠

水明浮棹疎村響急砧
灞亭橋畔柳恰為兩人陰

其二

窮老無相識如君得數過
祇貪懷抱盡其奈別離多
畫靜堪攤卷江寬足放歌
勝游佳絕處回首隔關河

其三

拂袖非長策蹉跎為老親
還家仍在客不仕却依人
勝識酬知己竒懷答鬼神
鏡湖千丈月莫染雒陽塵

其四

浪跡存吾道風流獨有君羣公雖走幣狂客自論文樽
酒堪呼月雙峰看出雲可憐滄海上宋玉正參軍

偶見

挾彈打文鵝翻身馬注坡輕鞭過易水大雪滿滹沱錦
帽垂青鼠銀罌出紫駝少時從出塞十五便橫戈

送詹司理之官濟南

詹楚人余所得士

匹馬指營丘風清肅爽鳩齊言盈萬戶楚客長諸侯梅
發江關信松高日觀秋故人慚鮑叔相送話東游

幼女

抱去纔周晬應難記別時信來偏早慧似解識京師書
到遲回問人前含吐詞可憐汝母病臨絕話相思

送程太史翼蒼謫姑蘇學博

道重何妨謫官輕却便歸程門晴雪迥吳市暮山微舊
俗弦歌在前賢文字非即今崇政殿寥落侍臣衣

送郭宮贊次庵謫宦山西

薄宦知何恨秋風刷羽毛因沾太行雪憶賜未央袍問

俗壺關老籌邊馬邑豪爭傳郭有道名姓壓詞曹

送純祐兄之官確山

五十猶卑宦栖栖在此行官從鵝炙貴客向馬蹄輕風
俗高持論山川喜罷兵清時人物重縣小足知名

其二

絕有明湖勝青山屬蔡州曾為釣臺客今作朗陵侯定
訪袁安卧須從叔度游政閒人吏散廳壁掃丹丘

其三

懸瓠城西路關山雪夜刀至今勞戰伐何日剪蓬蒿地
瘠軍租少官輕客將豪相逢蔡父老聞說漢功曹

其四

落日龍陂望西風動黍禾歸人淮右近名士汝南多河
上狐城迥天中萬馬過一官凋瘵後兄弟意如何

梅村集卷九

欽定四庫全書

梅村集卷十

國子監祭酒吳偉業撰

五言律詩三

過中峰禮蒼公塔

下馬支公塔經聲萬壑松影留吟處石智出定時鐘尚
記山中約誰傳海外逢平生詩力健翹足在何峰

其二

明月心常湛寒泉性不枯
烏啼香積散花落影堂孤
道在寧來去名高定有無
淒涼看筆塚遺墨滿江湖

其三

慧業誰能繼宗風絕可哀
昔人存馬癖近代薄詩才
鹿走譚經苑鴉飛說法臺
空懸竹如意落日講堂開

其四

故國流沙近黃金窳堵坡
胡僧眉拄地梵夾口懸河
傳法青蓮湧還家白馬馱
他年乘願到應認舊山河

蒼公
漢人

過王菴看梅感興

練川城南三十里爲王菴學憲王先生著書地
也有梅萬株不減鄧尉余以春日過其廢圃學
憲所著數種其版籍尚存

地僻幽人賞名高拙宦居客來唯老樹花發爲殘書斜
日空林鳥微風曲沼魚平生貪著述零落意何如

獨往王菴看梅沈雨公攜尊道值余已邁返賦此
爲笑

屢負尋山約偶然來此間多君攜酒至愧我放船還雙
屐成孤往千林就一閒誰知種花叟鎮日不開關

送致言上人

獨下千峰去蒼溪出樹腰雲生穿磴屐月滿過江瓢一
飯從村寺前身夢石橋經行無定着惆悵故山遙

過韓蘄王墓

訪古思天塹江聲戰鼓中全家知轉鬪健婦笑臨戎汗
馬歸諸將疲驢念兩宮淒涼岳少保宿州起秋風

其二

行在倉黃日提兵過故鄉
傳聞同父老流涕說君王
石馬心猶壯雲臺跡已荒
一杯堪漬酒殘日下平岡

其三

詔起祁連塚豐碑有賜亭
掛弓闕塞月埋劍羽林星
百戰黃龍艦三江白石銘
趙家金椀出山鬼哭冬青

其四

丘壘今蕪沒江山竟寂寥
松風吹北固碑雨洗南朝
細

路牛羊上荒岡草木凋肯容樵豎擾遺恨在金焦

宿沈文長山館

一徑艸堂偏湖光四壁天焙茶松竈火浴繭竹籬泉玉
鼠仙人洞銀鱸釣客船前村呼種樹偶語石橋邊

其二

遇山思便住此地信堪留謀食因溪確齋心在石樓漁
舟帆六面橘井樹千頭長共鷓夷子翩然結伴游

福源寺

去毛公壇三里為攢雲嶺有福源
泉寺以泉名羅漢松係梁朝舊物

千尺攢雲嶺金銀佛寺開
鹿仙吹笛過龍女換珠來
泉繞譚經苑松依說法臺
蕭梁留古樹風雨不凡材

包山寺贈古如和尚

古木包山寺蒼然曉氣平
石毛仙蛻冷

近毛壇

雲影佛衣

輕咒鉢蛟人聽彈碁鶴子驚
相逢茶早熟匡坐說無生

過圻村

萬壑響鳴蟬湖光樹杪懸
雲鬢神女廟雪乳隱君泉
山籠櫻桃重溪船菱芡鮮
相攜從此住松老不知年

湖中懷友

渺渺晴波晚青青芳草時遠帆看似定獨樹去何遲花
落劉根廟雲生柳毅祠香尊正可擷欲寄起相思

七夕即事

羽扇西王母雲輶薛夜來織神天上落槎客日邊回鵲
渚星橋迥羊車水殿開祇今漢武帝新起集靈臺

其二

今夜天孫錦重將聘雒神黃金裝鈿合寶馬立文茵刻

石昆明水停梭結綺春沉香亭畔語不數戚夫人

其三

仙醞陳瓜果天衣曝綺羅高臺吹玉笛複道入銀河曼
倩詼諧笑延年婉轉歌江南新樂府齊唱夜如何

其四

花萼高樓迥岐王共輦游淮南丹未熟緱嶺樹先秋詔
罷驪山宴恩深漢渚愁傷心長枕被無意候牽牛

大根菜

幾葉青青古穿泥弗染痕誰人愛高潔留汝歷涼溫輪
因形難老芳辛味獨存古來盤石重不必取深根

趵突泉

似瀑懸何處飛來絕壑風伏流根窈渺跳沫拂虛空石
破奔泉上雲埋廢井通錯疑人力巧天地桔槔中

其二

不信乘空起憑闌直濺衣池平難作勢石隱定藏機曲
水金人立凌波玉女歸神魚鱗甲動咫尺白雲飛

贈新泰令楊仲延其地爲羊叔子故里

置邑徂徠下雙槐夾訟堂殘民弓作社遺碣石爲莊野
繭齊紈美春泉魯酒香歸來羊太傅不用泣襄陽

靈巖觀設戒

湖山留霸跡花鳥供經臺不信黃池會今看白社開枯
潭龍洗出妙塔雁歸來此地闕興廢須資法將才

遙別故友

絕域重分路知君萬里餘馬頭辭主淚雁足覆巢書
艸

沒還家夢霜飛過磧車齊詣他日事應記北溟魚

其二

雪深難見日海盡再逢闕野鼠多同穴神魚似斷山只
應呼草地都不類人間勉謝從行者他年有箇還

秋夜不寐

秋多入衆音不寐夜沉沉浩劫安危計浮生久暫心鄰
雞殘夢斷牕雨一燈深薄冷披衣起晨烏已滿林

七夕感事

南飛烏鵲夜北顧鶴鵝軍圍壁鉦傳火巢車劍拄雲江
從嚴鼓斷風向祭牙分眼見孫曹事他年著異聞

喜願雲師從廬山歸

并序

願師住雲居十年而歸出其匡廬詩道五老石
門九竒三疊諸勝飛泉怪瀑不可思議而尤以
御碑亭雲海爲第一觀竟似住鏡光白銀二種
世界不知滄桑浮塵爲何等事矣願公贈予五
十初度詩其落句曰半百定將前諾踐敢期對

坐聽松聲蓋責予前約會時方喪亂衰病無家
顧以高堂垂白不能隨師以去也乃爲此詩答
之

勝絕觀心處天風萬壑聲石門千鏡入雲海一身輕出
世悲時事忘情念友生亂離兄弟恨辜負十年盟

贈錢受明

獨喜營時譽疎通邁等倫地從諸父重性似外家貧裘
馬無他好詩書別有神古來傳孝謹非必守前人

受明得子東賀

長因故人子往事憶流連
曾忝充閭會俄逢拜袞年
諸甥今甫爾入抱却依然
吾老猶堪待公卿只眼前

宿徐元歎落木菴

元歎棄家住故鄆山中亂後歸
天池丙舍落木菴竟陵譚友夏

所題也

落木萬山心蕭條無古今
棄家歸去晚別業住來深
客過松間飯僧留石上琴
早成茅屋計枉向白雲尋

送王子惟夏以牽染北行

晚歲論時輩空羣汝擅能祇疑櫟陽逮猶是濟南徵名
字供人借文章召鬼憎阿戎才地在到此亦何憑

其二

二十輕當世愁君門戶難比來狂大減翻致禍無端落
木鄉關遠疲驢道路寒敝衣王謝物請勿笑南冠

其三

客睡愁頻起霜天貫索明此中多將相何事一書生未
俗高門賤清時訟繫輕爲文投獄吏歸去就躬耕

其四

但可寬幽繫從教察孝廉昔人能薦達名士出髡鉗世
局胥靡夢生涯季主占定聞收杜篤寧止放江淹

虎丘中秋新霽

萬籟廣場合道人心地平天留今夜月雨洗去年兵歌
管星河動禪燈風露清淒涼闔閭墓斷壑起松聲

哭亡女

喪亂才生汝全家竄道邊畏啼思便棄得免意加憐兒

女關餘劫干戈逼小年興亡天下事追感倍淒然

其二

一慟憐渠幼他鄉失母時止因身未殞每恨見無期
白骨投懷抱黃泉訴別離相依三尺土腸斷孝娥碑

其三

扶病常聞亂漂零實可憂危時難共濟短算亦良謀
訣絕頻攜手傷心但舉頭昨宵還勸我不必淚長流

中秋看月有感

今年京口月猶得杖藜看暫息干戈易重經少壯難江
聲連戍鼓人影出漁竿晚悟盈虧理愁君白玉盤

支硎山齋聽雨明日早晴更宿法螺精舍

秋山所宿處指點白雲生故作中宵雨倍添今日晴一
峰當止觀萬象逼孤清更上上方去松風吹玉笙

憩趙凡夫所鑿石

石骨何年斲蒼然萬態收直從文字變豈止斧斤搜亂
瀑垂痕古枯松結體遒即今苔蘚剝一一類銀鈞

趙凡夫山居爲祠堂今改爲報恩寺

高人心力盡石在道長存古佛同居住名山即子孫飛
泉穿樹腹竒字入雲根夜半藤蘿月鐘聲冷墓門

靈巖繼起和尚應曹村金相國請住虎丘祖席

應物心無繫觀空老辯才道隨諸佛住山是相公開日
出巖齋鼓天清護講臺居然歌舞地人爲放叅來

王增城子彥罷官哭子留滯不歸近傳口信不得

一字詩以歎之

老狗妻孥意辭家苦萬端關心惟少子失計在微官客
夢烏衣巷鄉愁白石灘可憐消息到猶作兩人看

其二

庾嶺應逢雁章江莫寄魚遙知雙淚盡不遣一行書家
在無歸趣途窮失所如故鄉宜早去臨發乃長吁

寄懷陳直方

漢法三冬繫秦關萬里流可憐諸子壯不料闔門收要
路寃誰救寃思病獨留羈栖騎瘦馬風雪阻他州

其二

百口風波大三生夢寐真膏粱虛早歲辛苦得前身索
米芒鞋雪傭書布帽塵不知公府掾可識路傷人

其三

萬事偶相值愁中且遣家江山俄轉戰妻子又天涯客
酒消殘漏軍書過落花出門翻自笑安穩只龍沙

其四

時世高門懼似君誠又稀何辜憂并坐即免忍先歸苦

語思持滿勞生羨息機
向來兄弟輩裘馬自輕肥

詠月

長夜清輝發愁來分外明
徘徊新戰骨經過舊臺城
秋色知何處江心似不平
可堪吹急管重起故鄉情

訪商倩郊居有贈

花影瘦籬根江平客在門
曉吟寒入市晚食雨歸村
管記看山爽傭書宿火痕
西京游俠傳乃父姓名存

假寐得月

自少入公三
卷十
滅燭貪涼夜，隳陰夢不成。
雲從閉目過，月向舉頭生。
樹黑添深影，溪長耐獨行。
故人多萬里，相望祇盈盈。

三峰秋曉

曉色近諸天，霜空萬象懸。
雞鳴松頂日，僧語石房烟。
清磬秀羣木，幽花香一泉。
欲叅黃蘗義，便向此中傳。

偕顧伊人晚從維摩踰嶺宿破山寺

樹老不言處，秋深無事中。
雲根僧過白，霜信客來紅。
樵語隔林火，茶烟小院風。
杳然松下路，人影石橋東。

維摩楓林絕勝則公獨閉關結足出新詩見示

遇賞只枯坐秋林自着霜道心黃葉澹勝事白雲忘澗
水通茶竈山花對石牀靜中幽思足爲我出詩囊

夜發破山寺別鶴如上人

得來松下宿初月澹相親山近住難定僧高別更真暗
泉隨去馬急葉捲歸人過盡碧雲處我心慚隱淪

苦雨

響苦滴殘更愁中耳倍明生涯貪舊業天意誤躬耕乞

火泥連屋輸租潦滿城誰家歌舞宴徹曉不聞聲

茸城客樓大風曉寒吟眺以示友聖九日玉符諸

子

偶作扁舟興偏逢旅夜窮鴉啼殘夢樹客話曉樓風月
落三江外城荒萬馬中空持一尊酒歌哭與誰同

遇宋子建話故友有感

對酒徐君劍披襟宋玉秋蕭條當晚歲生死隔炎洲萬

里書難到三山夢可求

子建學仙

傷心南去雁老淚只交流

樓聞晚角

霜角麗譙聞天邊橫海軍旗翻當落木馬動切寒雲風
急城烏亂江昏野燒分何年鼙鼓息倚枕向斜曛

送錢子登赴大名

一騎衝寒雪孤城叫晚鴉叅軍雄鎮地上客相公家酒
盡河聲合燈殘劍影斜信陵方下士旅思莫興嗟

過諸乾一細林山館

興極期偏誤名山識旅愁橋痕穿谷口亭影壓溪頭霞

爛丹山鼎松鳴白石樓居然華燭夜先爲一峰留

神山夜宿贈諸乾一

高士能調鶴仙人得卧龍穿雲三徑杖聽月五更鐘管
樂名堪亞彭佺道自濃獨來天際住嘯詠赤城松

過徐文在西余山莊

已棄藍田第還來灞水濱烟開孤樹迥霜淨一峰真路
曲山迎杖廊空月就人始知蕭相計留此待沉淪

細林夜集送別倩扶女郎

遠翠入顰眉，輕寒袖半垂。
花生神女廟，月落影娥池。
深竹微風度，晴沙細履移。
回看下山路，紅燭爲誰遲。

天馬山過鐵崖墓有感

天馬龍爲友，雲山鳥自飛。
定愁黃紙召，獨羨白衣歸。
長卷心同苦，狂歌調已非。
悲來吹鐵笛，莫笑和人稀。

陳徵君西余山祠

通隱居成市，風流白石仙。
地高卿相上，身遠亂離前。
客記茶龕夜，僧追筆冢年。
故人重下拜，酌酒向江天。

橫雲

青嶂千金鑿丹樓百尺高空山開化迹異代接賢豪

李氏

園亭廢後近爲諸乾一改築

身世供危眺妻孥付濁醪雙眸雲背豁

飛鳥敢吾逃

送聖符弟之任蘄水丞

隨牒爲人佐全家漢水東
放衙廳壁冷趨府戟門雄
屈宋風塵下江山醒醉中
丈夫從薄祿莫作故園窮

其二

四十未專城除書負姓名才高方薦達地僻鮮逢迎夏

簞琴牀淨春泉茗椀清公餘臨墨沼洗筆畫圖成

蕪有陸羽

泉右軍洗筆池聖符善畫

其三

西上今吾弟分攜北固樓最高搔白首何處望黃州故

舊忻無恙烟波感昔游蕪春有香草相寄慰離愁

兼東畢協

公侍御

其四

訪俗曾經亂車過大澤鄉殘民談勝廣舊國記江黃廿
載流移復三湘轉運長正逢休息後

溫詔重循良

暑夜舟過溪橋示顧伊人

深岸聽微風江清不寐中舟行人影動橋語月明空寺
樹侵門黑漁燈颭水紅誰家更吹笛歸思澱湖東

佘山遇姚翁出所畫花鳥見贈

七十忘機叟空山羨獨行只今來白石當日住青城一

斗開顏笑千花洗筆成
那知牙齒落忽發浩歌聲

贈青溪蔡羽明

家傷山城住前賢定可追
一經傳漢相八法繼秦碑
仙是麻姑降才非唐舉知
逃名因賣藥不愧鹿門期

橘

莫設西山成蕭條是橘官

時洞庭初增兵將

果從今歲少樹爲

去年寒

昨冬大寒橘大半枯死

一絹輸將苦千頭剪伐殘茂陵消

渴甚只向上林看

蛤蜊

彊飯無良法全憑適口湯
食經高此族酒客得誰方
水斷車螯味厨空牡蠣房
江南沈昭略苦嗜不能嘗

膾殘

棄擲誠何細夫差信老饕
微茫經匕箸變化入波濤
風俗銀盤薦江湖玉饌高
六千殘卒在脫網總秋毫

石首

採鮮諸狹少打鼓伐臧冰
五月三江去千金一網能
尾

黃荷葉蓋腮赤柳條勝笑殺兒童語烹來可飯僧

燕窩

海燕無家苦爭啣白小魚却供人採食未卜汝安居味
入金齋美巢營玉壘虛大官求遠物早獻上林書

海參

預使燂湯洗遲纔入鼎鐺禁猶寬北海饌可佐南烹

產登

菜海中莫辨蟲魚族休疑草木名但將滋味補勿藥養

故無禁

餘生

比目

比目誠何恨滄波作伴游幸逃網罟厄可免別離愁小
市時珍改殘書土物收若逢封禪詔定向海邊求

得東海比

目魚始可封禪見管子

鮫

舊俗魚鹽賤貧家入饌輕自慚非食肉每飯望休兵餘
骨羶何附長餐臭有情腐儒嗟口腹屬饜負昇平

過吳江有感

落日松陵道堤長欲抱城塔盤湖勢動橋引月痕生市
靜人逃賦江寬客避兵廿年交舊散把酒歎浮名

莫釐峰

始信一生誤未來天際看亂峰經數轉遠水忽千盤獨
立久方定孤懷驟已寬亦知歸徑晚老續此游難

送沈友聖漢川哭友詩

并序

漢川顧西嶽侍御與雲間沈山人友聖爲布衣
交使吳深自折節友聖長揖就坐箕踞狂嘯無

所不敢當所居田坳蓬蔚衡門兩版侍御出郊
枉訪停車話舊一郡皆驚西嶽亡友聖徒步三
千里哭之糧盡道寒直前不顧予與友聖交厚
侍御亦以友聖之故厚予嘗三人虎丘夜飲其
鄭重之意形諸圖畫見於歌詩漢川之行惜予
不能從也爰作詩寓其悲焉

士有一知己無須更不平世翻嫌鮑叔人竊罵侯生置
飲忘形踞停驂廢禮迎柴門車轍在感舊淚縱橫

其二

得信俄狂走千山一哭中棄家芒屨雪爲位草亭風雨
水江聲合三聲友道空祇留黃鶴夢相見話詩翁

其三

貧賤誰曾託相逢許此身論文青眼客漬酒白衣人丘
壟松楸冷江山薤露新一杯傾漢水不肯負春申

其四

徒步愁糧盡傷心是各天雲埋大別樹雪暗小孤船死

友今朝見狂名到處傳
范張千里約重補入晴川

秦留仙寄暢園三詠

同姜西溟嚴蓀
友顏伊人作

山池塔影

黛色常疑雨溪堂正早秋
亂山來衆響倒景漾中流
似有一帆至何因半塔留
眼前通妙理斜日在峰頭

惠井支泉

石斷源何處涓涓樹底生
遇風流乍急入夜響尤清
枕可穿雲聽茶頻帶月烹
只因愁水遞到此暫逃名

宛轉橋

斜月掛銀河虹橋樂事多花敬當曲檻石礙折層波客
子沉吟去佳人窈窕過玉簫知此意宛轉采蓮歌

慧山酒樓遇蔣翁

桑苧誰來繼名泉屬賣漿價應誇下若味豈過程鄉故
老空山裏高樓大道旁我同何水部漫說撥醅香

家園次罷官吳興有感

世路嗟誰穩栖遲可奈何官隨殘夢短客比亂山多閉

閣凝香坐行厨載酒過却聽漁唱響落日有風波

其二

勝事難忘處陰晴檻外峰高臺爭見水曲塢自栽松失
志花還放離程鶴未從白雲長澹澹猶作到時容

其三

枉殉千金諾空酬一飯恩只今求國士誰與報王孫強
問裁詩卷長歌向酒尊古人高急難歎息在夷門

其四

劇郡非吾好蕭條去國身幾年稱傲吏此日作詩人京
洛虛名誤江湖懶病真一官知己愧所得是長貧

許九日顧伊人和元人齋中雜咏詩成持示戲效
其體

焦桐

流落中郎怨薰風意乍開響因知己出歌爲逐臣哀一
曲尊前奉千金爨下材漢家忘厝火絕調過江來

蠹簡

飽食終何用難全不朽名秦灰招鼠盜魯壁竄鯁生刀
筆偏無害神仙豈易成却留殘闕處付與豎儒爭

殘畫

原自無多筆年深色便凋茶烟衝雨過竹粉遇風飄童
懶屣從墮兒頑墨誤描六朝金粉地落木更蕭蕭

舊劍

此豈封侯日摩挲憶往年恩仇當酒後關塞即燈前解
去將誰贈輸來弗值錢不逢張壯武辜負寶刀篇

破硯

一擲南唐恨拋殘剩石頭江山形半截寶玉氣全收洗
墨池成玦窺書月仰鈎記曾疏闕失望斷紫雲愁

廢檠

憶曾同不寐棄置亦何心喜伴疎窓冷愁添老屋深書
將隣火映夢共佛燈沉莫歎蘭膏燼應無黠鼠侵

塵鏡

舉目風塵暗全遮皓魄輝休嗟青鏡改憐我白頭非秦

金瓶梅詞話卷十
女粧猶在陳宮淚怎揮不知徐孺子負局幾時歸

斷碑

妙蹟多完闕天然反失真銷亡闕世代洗刷見精神
處懸崖險裝來斷墨新正從毫髮辨半字亦先秦

過東山朱氏畫樓有感

并序

東洞庭以山後爲尤勝有碧山里朱君築樓教
其家姬歌舞君每歸自湖中不半里今從者據
船屋作鐵笛數弄家人聞之皆出樓西有赤欄

千累丈餘諸姬十二人艷粧凝睇指點歸舟於
烟波杳靄間既至即洞簫鈿鼓諧笑並作見者
初不類人世也君以布衣畜伎晚而有指索其
所愛者以是不樂遣去無何竟卒余偶以春日
過其里雖簾幙凝香而湖山晴美樓頭有紅杏
一株傍簷欲笑容爲余言君生平愛花病困猶
扶而漑酒再拜致別諸伎中有紫雲者爲感其
意至今守志不嫁嗟乎由此足以得君之爲人

矣爲題五言詩于壁上

盡說凝眸望東風徙倚身如何踏歌處不見看花人
舊曲拋紅豆新愁長白蘋傷心闕盼盼又是一年春

葉君允文偕兩叔及余兄弟游寒山深處

投足疑無地逢泉細聽來松顛湖影動峰背夕陽開
客過攜山榼僧歸掃石臺狂呼聲撼木麋鹿莫驚猜

查灣西望

屢折纔成望山窓挿石根溼雲低染徑老樹半侵門
漁

直看疑岸沙橫欲抱村湖光猶在眼燈火動黃昏

拜王文恪公墓

舊德豐碑冷湖天敞寂寥勳名高故相經術重前朝致
主惟堯舜憂時在豎刁百年人世改野唱起漁樵

胥王廟

伍相丹青像鬚眉見老臣三江籌楚越一劍答君親雲
壑埋忠憤風濤訴苦辛平生家國恨偏遇故鄉人

查灣過友人飯

碧螺峰下去宛轉得山家橘市人沽釀桑村客焙茶溪
橋逢樹轉石路逐灘斜莫負藍輿興天桃已著花

寒山晚眺

驟入初疑誤沿源興不窮穿林人漸小攬葛道微通湖
出千松杪鐘生萬壑中晚來山月吐遙指斷巖東

翠峰寺遇友

卧疾峰腰寺欹危脚步勞松聲侵殿冷花勢擁樓高薄
俗詩書賤空山將吏豪

時有成將
居寺中

不堪從置酒白髮自

蕭騷

登寒山高處策杖行崖谷中

側視峰形轉空蒼萬象陰斷巖湖數尺絕澗樹千尋日
透玲瓏影烟生窈靄心忽逢天際廣始覺所來深

沙嶺

亂峰當面立反憇得平丘坐卧此云適歌呼不自由支
頤蒼鹿過坦腹白雲留笑指鳥飛處有人來上頭

飯石峰

半空鳴杵白狼藉甌山傍莫救黔黎餓誰開白帝倉養
芝香作粒煮石露爲漿飯顆相逢瘦詩翁詎飽嘗

柳毅井

其地即橘社

仙井鹿盧音原泉瀉橘林寒添玉女恨清見柳郎心短
綆書難到雙魚信豈沉波瀾長不起千尺爲情深

雞山

夫差養闕雞處

飲啄丹山小長鳴澤畔雲錦冠虛恃氣金距耿超羣歛
翅雌猶守專塲勝未分西施眠正熟啼報越來軍

厩里

在武山吳
王養馬處

夫差弱秣地遺跡五湖傳柳葉青絲鞚桃花赤汗韉

武山

桃花爲東
洞庭一勝

降王羞執轡艷妾笑垂鞭老驥哀鳴甚西風

死骨捐

仙掌樓留別衆友

杯酒鏡湖平持來送客行可憐高會處偏起故園情烟
鳥窓中滅風帆樹杪生遙看沙渡口明日是離程

登東山雨花臺

白雲去何處我步入雲根一水圍山閣千花夾寺門日
翻深谷景烟抹遠天痕變滅分晴晦悠然道已存

留洞庭二十日歸自水東小港

漸覺湖天改扁舟曲曲行野橋誰繫姓村樹亦知名晚
市魚蝦賤煙汀菰米生偶逢空濶處重起舊灘聲


武山

本名虎山夫差於其地養虎
李唐諱虎爲武至今仍之

霸略誇擒縱君王置虎牢至今從震澤疑是射成臯土
俗無機穽山風少怒號千秋遺患處誰始剪蓬蒿

題郁靜巖齋前壘石

就石補竒雲潭幽亂石文貞堅應有性高下亦惟君烏
雀因人亂松杉我獨聞苔階含古色落落自同羣



梅
村
集
卷
十